

左恪靖侯奏稿續編

恪靖奏稿續編卷六十七目錄

陳明借定洋款摺

逆酋怕夏仰藥自斃摺

遵旨統籌全局摺

奏參山西藩司紊亂餉章摺

官軍剋期進剿應防賊蹤紛竄摺

陳明借定洋款摺

奏爲借定洋款請

旨飭下總理各國事務衙門分別知照以期迅速集事
恭招馳陳仰祈

聖鑒事竊臣軍餉項奇絀上年春間奏奉

諭旨准借洋款五百萬兩臣因已蒙

天恩飭撥部款二百萬兩又飭各省提前解餉三百萬
兩尚資接濟不必多借洋款耗費息銀是以於上年夏
間奏請緩借仍飭上海採運局道員胡光墉隨時與各

洋商籌議以今歲成交時年按次還款庶於軍餉有濟而各省之力亦紓均經奏明有案前因洋款事多夾雜久無確音不得已於四月內有籌撥部款之請茲接據胡光墉稟稱洋商知許厚如不足信臣借用洋款事均仍竊疑慮頓釋因向匯豐銀行借定五百萬兩彼國電報已先以銀二百五十萬兩裝船餘俟裝船有期再報惟洋商狃於同治十三年閩省所借洋款先收爛番後還實銀故事計自雖少獲利轉饒固以比照閩案爲請胡光墉與之再四斟酌彼借此還均用實銀按每月一

分二釐五毫起息由浙海粵海江海漢海四關出票作
七年勻還每年還兩次每次以六箇月爲期洋商猶慮
胡光墉或蹈許厚如前轍無以取信遠人胡光墉亦以
東西洋事故疊生慮有中變遂各議罰銀十五萬兩如
三箇月關票不到則罰銀歸期光墉承認如三箇月內
洋銀不交則罰銀歸匯豐洋行承認此等曲折固非華
商常例也臣維南路用兵局勢實爲順利祇因糧餉轉
運籌措艱難未能應手戎機遂因而稍滯茲據胡光墉
稟呈前情是秋深尚可望巨款到甘雖議息較前稍重

固未可恡小費而忽遠歎也。以七年計之，前歲總興本銀不過七十餘萬兩，每次尚只三十餘萬兩，初年息銀甚微，末年息銀稍增，以四省勻還，初起數年，每歲歲不過二十餘萬兩，而四省協濟甘餉，浙江每歲應一百四十餘萬兩，湖北江蘇廣東皆歲協九十餘萬兩，內外從中劃撥歸款，既各省力所優為，又時日尚舒，不至以迫促爲苦。而臣軍得此巨款，除還陝甘鄂滬借款外，尚不至束手無策，坐失機宜，遂飭其如議趕辦，除將胡光墉原稟鈔稿咨呈總理各國事務衙門外，惟向章洋行付

銀必須由該國駐京公使總稅務司知會各關領事官
稅務司又必以各關印票爲憑合無仰懇

天恩俯念邊軍待餉孔殷飭下總理各國事務衙門咨
行廣東浙江江蘇湖北四省督撫暨監督關道迅將前
項借銀五百萬兩作七年勻還本息銀兩分別出具關
票加蓋督撫關道關防仍照會英國總稅司轉飭四關
稅司一律蓋印簽押交上海採運局道員胡光墉妥速
辦理並由總理各國事務衙門知照駐京英使分別知
照上海英領事暨匯豐洋行照付銀兩蓋關票早到借

銀可以早提而西事亦得以早爲布署臣不勝激切待
命之至其關票本息銀兩每省每次應還若干均有向
章可循臣已札飭胡光墉照前辦理就近稟咨各省督
撫監督關道查照速行以免轉折合併申明謹具摺馳
陳伏乞

皇太后

皇上聖鑒訓示施行謹

奏光緒三年五月二十六日

軍機大臣奉

旨該衙門知道欽此

逆酋怕夏仰藥自斃捐

奏爲逆酋仰藥自斃逆子昇屍西竄經庫車緹回截殺
據各軍先後呈報恭摺馳陳仰祈

聖鑒事竊遠坂大捷安集延兵頭大通哈胖色提等概
行就縛自請公同上書酋長怕夏擒陝西逆回白彥虎
解赴軍前獻還南八城再懇

恩宥劉錦棠許之令其各選親信數人同所遣八城緹
回前去去後迄未得其回報茲據劉錦棠稟五月十四
日有哈密回王邁哈默特從前疊次所遣探迎其母之

回目和加木牙斯買賣色德可又阿布都買賣提續預
買賣提又蘇卜爾蓋秋如可等六名帶同逃出難回到
托克遜投營並持回哈密大臣路票呈驗訴稱我們前
後奉親王三次派赴南路訪尋老福晉一入吐魯番境
均被安集延卡兵盤獲送托克遜見怕夏怕夏即將我
們監押嗣隨怕夏到庫爾勒地方仍照前監押上年聽
得官軍破古牧地得了紅廟子安集延人南八城人都
害怕今年官軍破達坂城安集延人盡死其頭目又被
生擒纔頭九百餘人蒙恩釋放怕夏殺過數十人監押

一半餘俱潛逃回家各城纏回畏官軍之威感官軍之德愈恨怕夏不服其約束怕夏知人心已去日夜憂位四月上半月服毒藥死了其子海古拉將屍沈水中三日取出用香牛皮包裹嗾其死黨昇行昨聞庫車回子已將海古拉拏去原留庫爾勒之安集延大通哈胖色提一聞此信即將庫爾勒之糧倉軍火財物交白彥虎接管星夜馳赴庫車我等繞南面海沿子逃歸等情據張曜續開吐魯番纏回陸續自喀喇沙爾逃歸者僉供四月初市內外怕夏在庫爾勒飲藥自斃怕夏之子率

黨夥向西竄去白彥虎移踞開都河西岸與劉錦棠稟
報相同是逆酋怕夏畏懼自盡確鑿可據惟逆賢海古
拉經庫車纏回擊去如何下落尚無確報頃復據張曜
轉據魯克泌回目邁引報四月二十三日派薩吾提等
五人前赴羅布淖偵探賊蹤見羅布淖伯克據稱老怕
夏在庫勒死了小怕夏護屍西走將庫勒事務交白彥
虎並派有阿克木管理小怕夏走到庫車有托胡的夏
帶領庫車阿克蘇薩牙三處纏回頭將小怕夏及和闐
呢牙斯阿奇木伯克兩人殺了並將安集延人殺散其

留在庫勒之阿克木得信即將銀錢交付白彥虎說庫
車三處人現與小怕夏打仗我去一看就來想是不回
來了查所供之小怕夏即指海古拉庫勒即庫爾勒也
薩吾漫等並言羅布淖伯克盼官軍早到並開其子孫
三品伯克三名五品伯克三名七品伯克三名花名清
單呈閱連旬以來疊據各營偵報大略相同是逆子海
古拉經庫車阿克蘇等纏回截殺亦確鑿可據竊維安
集延酋怕夏本浩罕四部之一浩罕旣亡怕夏乘中原
多故遠略未遑竟敢盜踞南疆招納潰兵叛并盡取回

部四千餘里據而有之與北路客回同惡相濟追
天戈西指不卽束身歸命遁歸故巢竟敢勾結漏誅逆
回白彥虎肆其披猖公然抗拒及古牧大創烏垣紅廟
子疊克猶復堅據達坂托克遜吐魯番各城隘遏太兵
南下之鋒爲三窟深藏之計諸將士肅申

天討甫及旬餘各城隘一律掃除而達坂之克無一人
一騎得還老賊尤爲膽落比逆屬大通哈愛伊德爾呼
里等勸其縛送白彥虎獻回南八城自贖而怕夏聞敗
震懼臣能制白彥虎又平時恃其詐力虐遇纏回獲其

資財掠其男女靡惡不爲纏回怨毒已深至是羣思報復怕夏有所聞憂惶無措決計自斃希免顯戮而逆子昇屍西竄中途復經庫車阿克蘇等纏回截殺是誠積惡滅身天網無漏也查怕夏自稱舉調勒特汗有子四人長咬哥次名咬都嚕股魯急呼則海古拉第三子曾充阿克蘇伯克四子曾在吐魯番均不知名其留守本境之長子咬哥則尤非怕夏所愛也其留守喀什噶爾者聞係何姓本前換防武員不知何時叛投安集延以其女改名色哩嗎罕妻怕夏聞現尚帶叛兵二千餘此

外除安集延兵數千又有漢人五六十千纏回萬餘人在
彼耕種經商當兵均雜辦回裝以自別據各路偵報所
陳如此謹參核而識其大略尚未知確否也安集延在
浩罕各部中素稱強悍敢爲大言道光初張格爾爲變
卽恃其部眾爲親兵與官軍抗部人以經商致富與泰
西諸國通亦頗習其製造怕夏性暴而貪竊踞南疆八
城後狡焉思啟不僅夜卽自大已也此次屢經大創自
取滅亡回部內部已成瓦解之勢計八城中除喀什噶
爾尚須重煩兵力此外師行所至當無敢再抗顏行者

劉錦棠張曜軍律嚴明盡心撫輯從賊中逃歸者隨時
安集各處之被賊襲脅者隨時資遣計送歸烏魯木齊
者二千七八百名口送歸哈密者二千五六百名口皆
給以牛種賑糧俾得各安生業遠近聞風景附不約而
同察看情形南疆戡定有期差堪仰慰

聖鑒所有夷酋自斃逆子復經截殺緣由謹據實陳明
伏乞

皇太后

皇上聖鑒訓示施行謹

奏光緒三年六月十六日

遵

旨統籌全局摺

奏爲遵

旨統籌全局謹將愚慮所及據實直陳仰祈

聖鑒事竊臣於五月二十四日欽奉

諭旨關外軍情順利吐魯番等處收復後南八城門戶
洞開自當乘勝底定回疆殲除醜類以竟全功惟計貴
出於萬全事必要諸可久吐魯番固爲南路要隘此外
各城如阿克蘇等處尚有可據之形勢否回酋報知怕

夏綽送白彥虎繳回南八城之說是否可恃伊犁變亂
多年前此未遑兼顧此次如能通盤籌畫一氣呵成於
大局方爲有裨該大臣親總師干自以滅此朝食爲念
而如何進取如何布置諒早胸有成竹爲朝廷紓西顧
之憂其卽統籌全局直抒所見以慰廑念等因欽此跪
誦之餘具仰我

皇上眷顧西服

聖慮深遠於保大之中慮馭邊之略欽佩何言竊維立
國有疆古今通義規模存乎建置而建置因乎形勢必

合時與地通籌之乃能權其輕重而建置始得其宜
古以來中國邊患西北恆劇於東南蓋東南以太海爲
界形格勢禁尚易爲功西北則廣漠無垠專恃兵力爲
疆弱兵少固啟戎心兵多又耗國用以言防無天險可
限戎馬之足以言戰無舟楫可省轉饋之煩非若東南
之險阻可憑集事較易也周秦至今惟漢唐爲得中策
及其衰也舉邊要而捐之國勢遂益以不振往代陳蹟
可覆按矣顧祖禹於地學最稱淹貫其論方輿形勢視
列朝建都之地爲重輕我

朝定鼎燕都蒙部環衛北方百數十年無烽燧之警不
特前代所謂九邊皆成腹地卽由科布多烏里雅蘇台
以達張家口亦皆分屯列戍斥堠遙通而後
畿甸宴然蓋

祖宗朝削平準部兼定回部開新疆立軍府之所貽也
是故重新疆者所以保蒙古保蒙古者所以衛
京師西北臂指相聯形勢完整自無隙可乘若新疆不
固則蒙部不安匪特陝甘山西各邊時虞侵軼防不勝
防卽直北關山亦將無晏眠之日而況今之與昔事勢

攸殊俄人括境日廣由西而東萬餘里與我北境相連
僅中段有蒙部爲之遮閼徙薪宜遠曲突宜先尤不可
不預爲綢繆者也

高宗平定新疆拓地周二萬里一時帷幄諸臣不能無
耗中事西之疑

聖意堅定不搖者推舊戍之瘠土置新定之腴區邊軍
仍舊餉不外加疆宇益增鞏固可爲長久計耳方今北
路已復烏魯木齊全境祇伊犁尚未收回南路已復吐
魯番全境祇白彥虎率其餘黨偷息開都河西岸喀什

噶爾尚有叛弁逃軍終煩兵力此外各城則方去虎口
如投慈母之懷自無更抗顏行者新秋採運足供餘糧
栖歆鼓行而西宣布

朝廷威德且剿且撫無難挈舊有之疆宇還隸職方此
外如安集延布魯特諸部落則等諸邱索之外聽其翔
泳故區可矣英人爲安集延說者慮俄之蠶食其地於
英有所不利俄方爭土耳其與英相持我收復舊疆兵
以義動設有意外爭辯在我仗義執言亦決無所撓屈
至新疆全境向稱水草豐饒牲畜充牣者北路除伊犁

外奇台古城濟木薩至烏魯木齊昌吉綏來等處同飢
以來漢回死喪流亡地皆荒蕪近惟奇台古城濟木薩
商民散勇土著民人聚集開墾收穫甚饒官軍高價收
取足省運腳餘如經理得宜地方始有復元之望南路
各處以吐魯番爲腴區八城除喀喇沙爾所屬地多饒
瘠餘雖廣衍不及北路而饒沃或過之矣官軍已復烏
魯木齊吐魯番雖有駐軍之所而所得腴地尚不及三
分之一若全境收復經畫得人軍食可就地採運餉需
可就近取資不至如前此之拮据憂煩張皇靡措也區

區患忱實因地不可棄兵不可停而餉事匱絕計非速
復腴疆無從著手局勢所迫未敢玩愒相將至省費節
勞爲新疆置久安長治之策紓

朝廷西顧之憂則設行省改郡縣事有不容已者合無
仰懇

天恩飭戶兵兩部速將咸豐初年陝甘新疆報銷卷冊
各全分及新疆額徵俸薪餉需兵制各卷宗由驛發交
肅州俾臣得稽考舊章按照時勢斟酌損益以便從長
計議

奏請定奪茲因欽奉

諭旨統籌全局直抒所見謹據愚見所及披瀝陳伏
乞

皇太后

皇上聖鑒訓示施行謹

奏光緒三年六月十六日

軍機大臣 字寄光緒三年七月初二日奉

上諭左宗棠奏逆酋怕夏自斃情形並欽籌全局各一
摺據稱安集延逆酋怕夏經官軍擊敗後眾心離散遂

於四月間仰藥自盡其子海古拉率黨西竄亦被纏回
截殺等語該逆逼脅回眾佔踞南路各城肆其荼毒罪
惡貫盈今既窮蹙自斃餘眾勢必渙散事機極爲順利
惟白彥虎尚踞開都河西岸該逆稔惡已久罪不容誅
喀什噶爾爲叛并何姓所踞自應乘此聲威速籌殄滅
左宗棠擬俟新秋採運足供鼓行而西刻下已屆秋令
著卽檄飭各軍剋日進兵節節掃蕩各城回眾素受逆
酋脅制非盡日心從逆此時大軍西行咸知效順自當
分別良莠剿撫兼施以安眾心白彥虎素稱狡猾務當

設法就地擒斬毋任再行遠竄怕夏之子除海古拉外
尚有三人現在竄匿何處並著查明具奏左宗棠所陳
統籌新疆全局自爲一勞永逸之計南路地多饒沃將
來全境肅清經理得宜軍食自可就地取資惟目前軍
餉支絀若南路一日不平則曠日持久餉匱兵飢亦殊
可慮該大臣所稱地不可棄兵不可停非速復腴疆無
從著手等語不爲無見著卽督飭將士戮力同心剋期
進剿並揆時度勢將如何省費節勞爲新疆計久遠之
處與擬改行省郡縣一併通盤籌畫妥議具奏所請飭

部將咸豐初年陝甘新疆報銷卷冊各全分及新疆額
徵俸薪餉需兵制各卷宗由驛發交等語著戶部兵部
查照辦理將此由五百里諭令知之欽此

奏參山西藩司紊亂餉章摺

奏爲山西藩司任意取巧紊亂餉章請

旨飭部議處以免效尤仰祈

聖鑒事竊各省應協臣軍餉數同治八年三月經戶部
議奏每年銀三百三十二萬四千兩內開山西每月協
銀三萬兩又專協穆圖善軍餉每年銀一百二十萬兩
內開山西每月協銀一萬兩又米銀一萬兩此山西應
協西征餉銀每月五萬兩之成案也歷經西征糧台開
單咨部部臣按照核催山西歷任撫臣遵照籌解雖積

欠累成鉅款然從無指爲虛數不應解者上年十一月
藩司林壽圖到任乘前撫臣候代之際蒙詳按照同治
六年前山西撫臣趙長齡自奏每月二萬兩核算而置
同治八年戶部核定山西每月協銀五萬兩成案於不
顧且指戶部八年奏定實餉爲虛數西征糧台所開之
單戶部核催之文爲岐悞爲舛錯恣爲欺罔加之指斥
形諸公牘上瀆

宸聰不料其謬戾竟至於此閱該藩司原詳以安全馬
隊月餉一萬兩歸併協餉五萬兩合算實則戶部并未

將此款屏入應協五萬兩之內西征糧台亦未曾以此款開單咨催不知其說因何而起至穆圖善專餉乃其交卸督篆帶所部移駐乾那時所指各省協款因催收罕應仍隨時向西征糧台於臣軍餉項下提取供支前後數年穆圖善所收專款不過數十萬兩而糧台彙撥穆圖善餉需計已四百餘萬兩皆由臣軍餉項內通融那墊以資接濟此臣軍餉項受累最鉅者嗣穆圖善遵旨北上帶吉林黑龍江馬隊隨行所部步隊各營歸臣統轄維時西征餉項奇絀未能及時裁撤遂擬陸續挑

留漸次更換以資整理有易其營哨而留其弁丁者有
增減其弁丁而歸成營哨者遲之又久整飭乃有端緒
穆圖善之軍旣歸臣統轄其餉項應歸臣統收加一營
不能向山西議增撤一營不能爲山西議減更無論退
軍那墊穆圖善餉需爲數已鉅應由穆圖善所有專餉
填還也西征糧台按照每月五萬兩開單部臣按照每
月五萬兩核催從前山西撫藩各臣雖未能如數協解
并無以爲不應協不應解者何以事閱八年林霽圖乃
從而竊議其後指爲不應協不應解且指爲岐誤舛錯

耶且就山西解餉言之自同治八年部臣奏定每月五萬兩以後至今長短牽算每月并無解足二萬兩之事西征糧台雖按照開單戶部雖按照核催而山西之有協無協有解無解自若也臣亦未嘗有所責望林壽圖乃必欲蒙詳去任撫臣飾詞指駁從前虛款亦獨何居蓋亟思巧避不及八成處分不得不以歧悞之咎諉之西征糧台以舛錯之咎歸之部臣且微露到任後協解尚多一以見長一以杜後來之口臣之所謂取巧紊亂餉章者此其一山西旱荒太甚撫臣曾國荃日擊心憂

急思所以拯之無暇兼顧邊餉其飛章入

告籲懇

恩施疆吏之誼固宜如此

朝廷軫念災黎無微不至邊餉與荒政緩急自有權衡

部臣仰體

宵旰憂勤必能盡力籌維以慰

聖懷而期兼顧

微臣

身膺邊寄雖兵事餉事拍掣不遑

然同值時艱絕無奪飢民之食以飽邊軍之理曾國荃

履任後有書致臣於晉省飢荒餉源支絀情形言之頗

詳末言甘肅茶務必當共圖補救臣復其書亦祇詳言
茶利宜歸之官不分區域彼此相宜於晉餉仍無隻字
道及慮以此分其心耳頃接其鈔咨摺稿忽有與藩司
林壽圖籌商請以廣東福建浙江三省協晉之款撥抵
臣軍之奏曾國荃初莅山西於款項虛實未暇致詳林
壽圖總綰藩條某款有著無著自已了然如三省協晉
本有著之款則由晉催收正資挹注何庸轉撥臣軍如
係無著之款則是畫餅相貽事同兒戲亦奚取夫此至
閩浙本臣舊歷之地兩省經費出入大宗皆所深知浙

江前撫臣楊昌濬雖已去任而往蹟尚堪覆按接任者均知邊餉關重當不漠然置之至閩浙督臣何璟於臣軍餉事尤極關懷公忠古誼素所深仰兩廣督臣劉坤一於代還洋款外籌措提前之餉矢盡心力是三省協款不催自急可知茲復加撥協晉之餉竊虞有志未逮而徵臣不免盡歡竭忠之疑林壽圖但思藉人之力規免處分不知此端一開則各省關陳欠均可藉抵實餉部定協款均屬虛文而臣軍餉事將歸烏有比效尤者接踵而起於是而追咎作俑之人不已晚乎臣之所謂

取巧紊亂餉章者此又其一語不云乎實事好做實話
好說山西旱荒如此疆臣急於拯救奏請緩解邊餉臣
固無辭若如林壽圖之但懷私見玩視急需并貽誤全
局臣不能以無言也謹據實參
奏伏懇

天恩飭部臣詳查成案將山西藩司林壽圖議處以儆
效尤而維大局是否有當伏祈

皇太后

皇上聖鑒訓示施行謹

奏光緒三年六月二十九日

光緒三年七月十五日內閣奉

上諭左宗棠奏山西藩司任意取巧紊亂餉章請飭部
議處一摺山西每月應協西征餉銀自應遵照向章盡
力籌解據左宗棠奏山西藩司林壽圖到任後蒙濶具
詳將該省應解西征餉銀按照同治六年每月二萬兩
核算置同治八年戶部核定每月五萬兩成案於不顧
指實餉爲虛數巧避不及八成處分實屬紊亂餉章請
飭部詳查成案將林壽圖議處等語著戶部查明山西

應解西征月餉歷屆成案據實具奏欽此

官軍剋期進剿應防賊蹤紛竄摺

奏爲新疆南路官軍剋期進剿應防賊蹤紛竄恭摺馳

陳仰祈

聖鑒事竊臣欽奉光緒三年七月初二日

上諭左宗棠擬俟新秋採運足供鼓行而西刻下已屆
秋令著卽檄飭各軍剋日進兵節節掃蕩白彥虎素稱
狡猾務當設法就地擒斬毋任再行遠竄等因欽此見
據總理行營營務處總統馬步各軍西甯道劉錦棠稟
稱托克遜各城攻克後擬乘勝進規南路八城祇因吐

魯番新糧收穫需時哈密巴里坤車馱轉運陳糧難於
驟集正值駝隻歇廠轉運艱難無從設法又地本火居
舊壤夏令炎威灼人未可急進擬俟八月初旬涼風清
至各營糧運稍資裹帶當卽獎帥師徒鼓行而西惟近
據降回供稱逆回白彥虎一股分踞庫爾勒附近一帶
議俟官軍進逼卽翻山北竄伊犁綏來等處請卽咨行
北路軍營加意以探截擊務遏竄蹤臣維安集延逆酋
怕夏父子伏誅餘孽自無乘巢遠竄之事惟白逆一股
分踞庫爾勒附近一帶極爲散漫該逆悍勢不足狡猾

有餘見雖偷息開都河西岸一聞官軍進逼其避兵鼠
竄自在意中察看賊之竄路有三一西竄庫車阿克蘇
一帶一迤西而北竄伊犁境內一東南竄羅布淖爾取
道吐魯番界覓荒僻無人之境東竄敦煌以取通海藏
之路就此三路而言如西竄庫車阿克蘇是本官軍追
賊必出之途無庸別籌布置如旁竄羅布淖爾一帶地
僻人稀逆眾盤旋山澤間難以善脫狡謀或不出此惟
翻山而竄伊犁邊界以出昌古綏來則地勢平衍道路
紛歧難於遮截非預爲擇要堵剿不可也臣已密飭劉

錦棠張曜於進兵時就近攔截遏賊奔衝免分兵力賊果西竄自當躡蹤追剿期於盡殺乃止如其回竄而南張曜所部及留後各營當相機截擊巴里坤哈密安西等處防營節節布置尚可無虞所宜預爲籌策者北竄一著耳窮寇亡命狂奔急何能擇苟恃距賊過遠防範稍疏誠慮倉猝聞警將貽意外之患傳曰不備不虞不可以師此所宜慎也除飛咨幫辦軍務伊犁將軍臣金順暨駐精河之廣州副都統福珠哩嚴飭所部遠發偵探加意預防一遇回逆叛匪竄近卽行截剿毋使一名

滯網并飛咨署烏魯木齊都統臣英翰檄飭統領卓勝
軍金運昌加意偵探防剿毋稍疏忽外相應請

旨飭下額勒和布保英英廉金順英翰一體加意嚴防
以昭周密而竟全功所有官軍剋期西進並防賊紛竄
情形恭摺馳陳伏乞

皇太后

皇上聖鑒訓示施行謹

奏光緒三年七月十九日

軍機大臣

字寄光緒三年八月初四日奉

上諭左宗棠奏南路官軍剋期進剿請飭嚴防北竄一摺逆酋怕夏伏誅後白彥虎一股分踞庫爾勒附近一帶劉錦棠張曜各軍見在剋期進剿誠恐該逆避兵紛竄轉致蔓延左宗棠務當飭令各軍探明賊蹤繞前截擊遏其旁竄以期就地殲除刻下怕夏既斃賊勢渙散未必甘受白逆脅制大軍西進并可曉諭回眾但將逆首設法擒獻餘眾可從未減果使白逆就誅各城自必聞風納款不致重煩兵力第該逆素稱狡猾恐其一聞官軍進發由西路翻山乘虛奔突則北路各城又形喫

重著金順英翰柴全額勒和布車林多爾濟杜嘎爾保
英英廉督飭各營勤加偵探嚴密防範遇有賊匪竄出
卽行實力堵剿毋任竄逸將此由六百里各諭令知之
欽此

恪靖奏稿續編卷六十八目錄

臬保克復烏魯木齊瑪納斯出力員弁摺

後路籌兵籌餉各員懇 恩獎叙摺

查明息借洋款情形摺

官軍連復喀喇沙爾庫車進規阿克蘇摺

龔保克復烏魯木齊瑪納斯出力員弁摺

奏爲遵

旨龔保克復烏魯木齊瑪納斯各城尤爲出力文武員
弁懇

恩獎叙以勵軍心恭摺具陳仰祈

聖鑒事竊

臣

於上年八月初一日奏報官軍會師攻拔

古牧地堅巢連克烏魯木齊迪化州各城戰狀請獎一
摺欽奉光緒二年八月十六日

上諭其餘尤爲出力各弁勇著左宗棠查明彙案保獎

等因欽此十一月十一日會奏攻克瑪納斯南城戰狀並聲明此外出力員弁勇丁容卽查明彙案保奏奉

上諭餘著照所議辦理等因欽此竊

微臣

白奉

命督辦新疆軍務委三品卿銜布政使銜西甯兵備道法福靈阿巴圖魯劉錦棠統領烏步全軍從征出關並委總理行營事務簡練將卒次第成行當盛暑時踰越重險掃蕩而前前隊甫抵濟木薩劉錦棠卽與幫辦軍務臣金順籌商值餘糧栖歛急起乘之詎知烏垣逆賊已率黨移踞古牧地堅巢樹柵築營誓死穩抗劉錦棠

獎率師徒奮迅齊攻一戰而拔黃田丰壘再戰而拔古
牧地堅巢乘勝連下烏魯木齊各城及僞建新城餘威
不振旋因瑪納斯南城遺孽負隅死拒復調集團攻兩
月克之自此新疆北路始識

天威不特積年悍賊悉數殲夷卽異域克渠亦羣嬰駢
戮是則將士血戰之苦趨事之勤有可言者非感荷

皇仁偷渎之深何以羣情鼓舞士氣常新臻效至此據
劉錦棠開單稟請獎勵前來

臣詳加覆核並無冒濫謹

繕清單恭呈

御覽至各軍在事出力各弁勇均另摺彙保其藍翎千
總以下各弁照例咨部註冊伏懇

恩施允加獎叙以示鼓勵庶償前勞而策後效微臣亦

得所藉手勉效馳驅謹會同幫辦新疆軍務伊犁大臣

伊犁將軍臣金順恭摺具

奏伏乞

皇太后

皇上聖鑒訓示施行謹

奏
光緒三年八月初四日

軍機大臣奉

旨另有旨欽此

後路籌兵籌餉各員懇

恩獎叙摺

奏爲新疆軍事順利後路籌兵轉餉鎮撫軍民裨益大
局懇

恩獎叙以昭公允恭摺陳明仰祈

聖鑒事竊臣以非材恭承

恩命督辦新疆軍務自忖才力不逮不副其志及喪病
餘年智慮日絀值茲時艱孔棘每深顧此失彼之虞幸
蒙

天恩簡派劉典幫辦陝甘軍務駐鎮蘭州而後根本有

託微臣得以遄赴關塞竭薄效以赴事機劉典本臣同
心素交曾權陝西撫篆於漢回情形素所洞悉兩省將
吏長短及所深知故措注必當人情而軍民悉臻安謐
臣軍欠發歷年勇餉八百餘萬兩經臣疊將各統帶營
官薪水辦公銀兩及勇丁虛名截晰陸續劃扣彌補截
至上年二月臣啟行赴肅時止尙懸欠四百餘萬兩劉
典精心簡核輪調各營赴省點驗汰弱留強按名算餉
存候給領通計一年有奇不但欠餉無增而舊欠且核
減一百數十萬兩撤退冗雜歸併成營士氣益奮並於

時修葺省會外城一律完整未資民力節省經費又近
二十萬兩每遇各省關協餉解到先運肅州以濟前敵
餉需採糧轉運各巨款雖當艱難拮据之秋而漠回安
戢兵勇無譚則剡典之力也陝西撫臣譚鍾麟勤求吏
事深念民艱籌兵籌餉惟知以大局爲重每聞臣與金
順餉需窘乏必力圖接濟分甘絕少憂患與共催收協
款緩急協宜數年以來疆宇乂安輿情綏靖俾臣得壹
意籌邊無庸分心內顧則譚鍾麟之力也茲值新疆軍
事機局順利裁定可期合無仰懇

鴻施先加甄叙幫辦陝甘軍務二品頂戴太僕寺卿雲

騎尉世職阿爾剛阿巴圖魯

三劉典應否

加恩從優獎勵頭品頂戴陝西巡撫

臣譚鍾麟應否

賞戴花翎伏候

聖裁至辦理西征糧臺陝西布政使蔣凝學會辦西征

糧臺辦理軍需局布政使銜陝西陝安道沈應奎於臺

局一切事務經理妥速遇有緩急隨時稟商撫

臣通融

接濟並息借商款維繫軍心委駐湖北辦理陝甘後路

糧臺二品頂戴湖南卽補道王加敏自咸豐十年隨征

江西安徽浙江福建廣東經理臣軍臺局事宜嗣復辦理陝甘後路糧臺事務事必躬親不避勞怨遇餉源涸絕必多方設措挪借巨款以濟要需因駐鄂辦理糧臺未及到省以故湖南無補缺之期合無仰懇

天恩加以甄錄蔣凝學可否

賞加頭品頂戴沈應奎可否

賞給從一品封典王加敏可否改留湖北以道員遇缺儘先題奏之處伏候

聖裁頭品頂戴甘肅布政使崇保布政使銜甘肅按察

使史念祖布政使銜陝西按察使裕寬布政使銜蘭州道琫武籌辦餉需毫無疏誤均請

旨飭部從優議叙以示鼓勵其關內外各局辦事出力各營防務認真及各省護運委解妥慎周詳文武員弁容俟查明具

奏再懇

鴻施謹將勞績顯著大員及出力各司道先行陳明仰懇

天恩獎叙以昭公允而示激勵是否有當伏候

皇太后

皇上聖鑒訓示施行謹

奏
光緒三年八月初四日

光緒三年九月初五日內閣奉

上諭左宗棠奏後路籌兵籌餉各員懇恩獎叙一摺新
疆軍務順利幫辦陝甘軍務太僕寺卿劉典等在後路
鎮撫軍民籌兵籌餉均屬著有勞績自應先加甄叙劉
典著賞給頭品頂戴陝西巡撫譚鍾麟著賞戴花翎陝
西布政使蔣凝學著賞給頭品頂戴陝安道沈應奎著

新編卷之二
賞給從一品封典湖南補用道王加敏著改歸湖北以
道員遇缺儘先題奏甘肅布政使崇保按察使史金祖
陝西按察使裕寬蘭州道瑋武均著交部從優議叙餘
著照所議辦理該部知道欽此

查明息借洋款情形摺

奏爲查明道員胡光墉息借洋款情形據實陳明應請
旨飭下總理各國事務衙門速將磅數息數知照駐京
英使轉行上海英領事暨匯豐銀行如限付銀以免岐
悞事竊

臣

於肅州行營欽奉光緒三年七月初三日

上諭總理各國事務衙門奏左宗棠請借英商匯豐行
銀五百萬兩前據奏明每月給息一分二釐五毫現接
該督緘稱匯豐行係每月一分行息因該行只允借番
銀甘肅向不使用道員胡光墉復向德商泰來銀行商

令包認實銀每月加息銀五釐五毫而匯豐行商人擬
定照會文稿文稱息銀每年不過數百各殊現已將分
晰緘致英國使臣情形緘復該督等語備用并款若辦
理稍末周妥及數目參差所關出入甚鉅此項息銀或
以年計或以月計及如何支給之處著左宗棠查照該
衙門緘詢各節迅速詳查一切奏明辦理原片著鈔給
閱看欽此臣伏查此案未奉

諭旨之先准總理各國事務衙門飛緘詢問前因比即
照錄馳詢道員胡光墉茲據覆此項借款雖是一事惟

原借仙令係英商匯豐洋行繼包認實銀係德商泰來
洋行英商計息只按年一分者由於樂用仙令冀價高
獲利也德商計息必按月一分二釐五毫由於包認仙
令豫備價落貽墊也胡光墉慮軍餉緊急既請以每年
一分之息照會英國成借及慮仙令價值無常異日歸
還增累故加爲每月一分二釐五毫之息包給德商承
認首尾本屬一貫惟前次稟呈匯豐行擬定照會文稿
未經聲叙明晰以致數目參差臣接胡光墉此次來稟
檢其前後各稟詳加考核覺其中原委均屬實在情形

此項借款上海英領事暨匯豐行付銀必須駐京英使知照而駐京英使必須總理各國事務衙門知照駐京公使之文一則照錄奉

諭准借一則聲明磅數息數共二件臣已於六月內據胡光墉稟呈匯豐行擬式鈔請照行在案現據胡光墉稟七月二十四日正限將逾欽奉

諭旨轉行之文已經到滬惟磅數息數明文尙未見到倘至九月半後展限又逾而磅數息數明文遲到誠虞罰銀三十萬兩難以收回而議借之五百萬兩亦難理

說臣覆核屬實應請

飭下總理各國事務衙門查明前項照會如尚未行卽
飛行駐京英使查照速行免因逾限別生枝節不勝激
切待

命之至所有遵

旨查明道員胡光墉息借洋款實無別故除將胡光墉
來稟匯豐泰來兩洋行合同並重鈔匯豐行原擬照會
息數磅數文稿咨送總理各國事務衙門分別覆核照
行外謹據實馳陳伏乞

皇太后

皇上聖鑒訓示施行謹

奏光緒三年八月十六日

軍機大臣奉

旨依議該衙門知道欽此

官軍連復喀喇沙爾庫車進規阿克蘇摺

奏爲官軍進規新疆南路連復喀喇沙爾庫車兩城仍躡蹤追剿進規阿克蘇並布置後路恭摺馳陳仰祈

聖鑒事竊臣前奏奉

諭旨左宗棠擬俟新秋採運足供鼓行而西刻下已屆新秋著卽檄飭各軍剋日進兵節節掃蕩比卽恭錄行知嗣據總理行營營務處總統馬步各軍三品卿銜布政使銜甘肅西甯道法福靈阿巴圖魯劉錦棠報稱七月十七日先派提督湯仁和率隊由托克遜進紮蘇巴

什阿哈布拉兩處八月初一日續派總兵董福祥張俊
等率步隊三營由阿哈布拉桑樹園庫木什榆樹溝星
星子烏沙塔拉一帶前進安紮哨壘至曲惠安營又派
提督張春發率隊由伊拉湖小道進至曲惠與張俊會
隊均曳負薪草開濬泉井按程預備以待大隊續至二
十一日劉錦棠分飭各步隊由大路進自率馬隊各營
由小路進二十六日齊抵曲惠詢知十八日有騎賊百
餘前來窺探瞥見官軍隊伍卽返馬狂奔二十七由派
提督余虎恩黃萬鵬等率馬步十匹營取道烏沙塔拉

傍博斯騰淖爾西行出軍爾勒之背爲奇兵二十九日
劉錦棠率隊由大路向開都河進發爲正兵開都河源
自天山之麓匯而南趨貫庫爾喀喇沙爾之中下流
注於博斯騰淖爾古所謂沕澤者也白逆自喀喇沙爾
過開都河西岸卽壅開都河水以阻官軍漫流泥濘闊
可百餘里劉錦棠師至遣騎試探深者滅頂淺者亦及
馬背次日舍淖路望鹹地進行六七十里一溪前橫深
亦丈許傳令將士晷水逕過仍向鹹地紆折而前約百
二十里方達開都河東岸飭馬步五營搭造浮橋堵塞

上流就原來鹹地掘修車道九月初一日劉錦棠親
喀喇沙爾城中巡視大城水深數尺官署民舍蕩然無
存所有纏回均被白逆迫脅隨行間有存者隱匿山舍
不敢出也劉錦棠諭和碩特台吉札希德勒克速遷所
管蒙民數百戶前來以實後路初一日率蒙民嚮導採
河身淺處輕騎減裝亂流而渡沿途民舍均已燒燬亦
無居民初三日過哈爾哈阿滿溝馬隊在前突有騎賊
百餘斜掠而過騎兵縱馬追斬十餘騎生擒兩賊驗視
皆安夷裝束訊之則陝回也據供白逆於秋糧甫獲卽

迫繩頭悉數搬糧入庫車聞官軍將至迫其隨行回性
怯弱不敢有違此來爲探官軍進止訊畢斬之是日余
虎恩等亦從間道馳至比入庫爾勒則空城一座聞無
人煙而行糧已罄後路轉運車駝未至軍無見糧劉錦
棠令軍士覓掘窖糧得數十萬斤一面飛報後路轉運
接濟一面派員招輯難回此九月初一初三等日官軍
收復喀喇沙爾庫爾勒等城安撫難民之實在情形也
劉錦棠偵知白逆因策達雅爾洋薩爾兩處纏回及烏
魯木齊吐魯番各難回尙有未經盡徙者復至洋薩爾

迫脅隨行乃於各營步隊挑選健卒一千五百名馬隊
挑選精騎一千名作爲頭隊親率以行令道員羅長祐
管帶後隊各營及輜重繼進初十日行百七十里駐庫
爾楚次日行百六十里駐策達雅爾探報白逆於回內
盡驅洋薩爾纏回同回布告爾卽令頭隊炊食二更啟
行八十里至洋薩爾但見各村堡火光燭天杳無人聲
知該逆臨行放火傳令後隊撲救仍率頭隊卽進行一
百里至布告爾日已交午報稱回莊之前賊騎千餘排
列黃萬鵬等率馬隊進擊賊拔其少猛撲前來譚拔萃

等率步隊趨前接戰騎賊敗卻我軍乘勢追擊陣斬百餘名生擒十餘名至莊西十餘里收隊蓋是日已行二百里矣訊據擒賊供稱白逆家口已於前十日過此並有悍賊二千護之此間與洋薩爾纏頭及烏魯木齊哈密吐魯番各城裹來漢回喀喇沙爾裹來蒙民均經白逆派令頭目驅向庫車此起係殿後之賊等語初十日五更頭隊行四十里瞥見前面騎步數萬以測微鏡瞭之見持械賊不過千餘其餘皆扶老攜幼驅車牽牛雜遝攢集知爲賊脅難民劉錦棠傳令手執軍械者斬餘

均不問須臾號鼓齊鳴馬步並進賊敗委難民而去甫
數里復列隊挺矛以待官軍奮威衝殺賊乃狂奔是日
駐營阿爾巴台劉錦棠派陶生林護難民歸布告爾渾
薩爾兩處權爲安插十一日馳抵托和奈地方令數十
騎偵視回莊有無伏賊遇數賊奪門出擒訊始知白逆
於是日逕向庫車竄走莊中蒙回未被脅去者尙萬餘
均伏地號呼劉錦棠撫諭安居如常勿庸驚怖是夜四
鼓拔隊行三十里距庫車大城不遠聞鎗礮聲官軍急
進見纏回數萬散布郊原訊知皆庫車之不願隨賊西

行者賊見官軍至方集隊抗拒劉錦棠令黃萬鵬崔偉
畢大才禹中海禹益長李金良馬殿林率旌善馬隊由
右譚拔萃賀長發戴宏勝率步隊繼之章洪勝方友升
夏辛酉張宗本率馬隊由左張俊胡登花石蘊玉率步
隊繼之劉錦棠自率馬隊居中調羅長祐率後隊馬步
繼進騎賊四五千分兩路來拒官軍擊之斃賊已多賊
仍死鬪譚拔萃等步隊繼進正鏖戰間羅長祐後隊馬
步大至橫躍入陣賊始大潰官軍乘勝蹙之追殺四十
里沿途賊屍駢列約計陣斃之賊不止千數也自此西

行卽度戈壁非搗水不可而庫車纏回急宜安撫遂收
隊回庫車撫諭回民令各安堵如故訊擒賊供本日陣
前轟傷賊目卽賊中總領馬由布也白逆聞官軍連到
先遣人護眷口西行已爲殿後並嚇悍黨迫脅回衆隨
行比官軍奄至回衆不願前進諸賊正開鎗轟逼忽官
軍大至悍黨乃舍所脅回衆以拒官軍不料一敗至此
問白逆裏回衆隨行者何意擒賊供聞賊中計議一使
官軍無所資藉難以遠追一欲多裏纏回至喀什噶爾
獻之新怕夏伯克胡里爲結納計訊畢斬之此九月十

二日克復庫車城安撫回衆實在情形也十三日劉錦棠拔隊啟行馳百八十里次日抵扣色爾發報後仍緊追拜城以指阿克蘇將窮賊所往盡力追殺其張曜一軍於九月初旬次第進發張曜料理善後畢中旬亦即啟行臣以喀喇沙爾本南路入城之一庫爾勒舊號腴區蒙回被賊驅迫非其本懷應設撫輯善後局籌給賑種待以來歸課以耕牧一面平治道路修造渡船安設驛站以通商旅而速郵傳現委同知銜留川補用知縣黃繼裕分省補用巡檢顏廷奎作爲喀庫善後撫輯局

員攜銀前往妥爲經理其庫車至阿克蘇一帶雖沿請
張曜於繼進之便隨時規畫而經理必有專員已飭古
城採運局布政使銜道員陶兆熊馳赴劉錦棠軍前聽
候差委將來大軍前進局勢山寬克一城卽須設一局
委員尙宜預爲遴派庶資差遣也此次劉錦棠率所部
馬步追剿逆回擒斬悍賊雖不過千數百名而自庫爾
勒啟行躡蹤奮擊六日夜馳九百里收復喀喇沙爾庫
車兩城其餘城堡回莊無數現指阿克蘇拔出被裹回
衆以十萬計據報庫車一帶糧料充足用價採買較吐

魯番尙易不但可省轉運勞費並免遲悞戎機尤爲幸
事將士感沐

皇仁踴躍前驅不辭艱瘁其勞烈實有未可掩抑者應
否

恩允存記彙獎出自

聖裁其力戰陣亡之記名提督精勇巴圖魯王慶福提
督銜記名總兵曾又得儘先補用都司楊玉昌都司銜
補用守備楊寶林李景清藍翎補用守備廖翰卿藍翎
千總孫得勝康福梁得勝藍翎把總鄧臣忠鄺得勝等

十一員應請

旨飭部各照官階從優議卹以慰忠魂謹將追剿獲勝連復喀喇沙爾庫車各城現籌進取並籌布後路情形會同幫辦新疆軍務大臣伊犁將軍臣金順恭摺馳陳伏乞

皇太后

皇上聖鑒訓示施行謹

奏

光緒三年十月十四日

光緒三年十月二十九日內閣奉

上諭左宗棠奏官軍進規新疆南路進復喀喇沙爾庫
車兩城一摺本月七月間甘肅西甯道劉錦棠統率所
部由吐魯番援隊西進回逆白彥虎自喀喇沙爾竄渡
開都河西岸纏回均被該逆迫脅隨行官軍於九月初
一日入喀喇沙爾城並於初三日將庫爾勒城收復白
彥虎復由洋薩爾一帶西竄劉錦棠親率頭隊疾馳數
百里至布告爾回莊逆匪列隊抗拒官軍奮勇衝擊先
後斃賊千數百名於是月十二日克復庫車城其餘城
堡回莊收復無數拔出被脅回衆以十萬計剿辦甚爲

得手仍著左宗棠督飭各軍乘勝進剿將逆首白彥虎
剋日殲擒肅清疆圉此次出力將士准其彙案請獎陣
亡之提督王慶福提督銜總兵曾又得都司楊玉昌都
司銜守備楊寶林李景清守備廖翰卿千總孫德勝康
福梁得勝把總鄧臣忠鄔得勝著交部各照官階從優
議敘以慰忠魂欽此

軍機大臣 字寄光緒三年十月二十九日奉

上諭左宗棠奏官軍克復喀喇沙爾庫車兩城進規阿
克蘇情形一摺覽奏已悉本日已明降諭旨宣示並將

陣亡各員議卹矣此次道員劉錦棠督率官軍乘銳西
進連復喀喇沙爾庫車兩城事機尙順惟逆首白彥虎
一意西竄勢將與喀什噶爾之賊合併以圖抗拒若不
將該逆擒獲終成不了之局劉錦棠現向阿克蘇跟蹤
追剿張曜一軍亦已繼進庫車一帶糧料充足就近採
買可省轉運之勞軍士遠道荷戈藉資鼓腹自必愈形
踴躍著左宗棠飭令各軍奮勇進發繞前截擊務將白
逆就地擒斬毋任遠竄其已復地方應如何派兵扼紮
防賊抄襲及如何綏輯纏回之處均爲籌畫北路一帶

有無匪黨翻山繞越尤恐自逆徑由阿克蘇竄向伊犁
著金順懷遵前旨督飭各營嚴加防範毋稍疏虞將此
由六百里各諭令知之欽此